

**Naalakkersuisut UKA 2017-mut inuit nunaqarfinni, illoqarfinnilu mikinerni  
illuliornissamut aningaasaliiffiqineqarnissaminnut pitsaanerusemik  
periarfissaqalernissaat pillugu pilersaarusequllugit Inatsisartut aalajangiiffissaattut  
siunnersuut**

*Inatsisartunut ilaasortamit Bendt B. Kristiansenimit, Inuit Ataqtigiit, saqqummiunneqartoq*

**pillugu**

**Sanaartornermut Ataatsimiititaliap**

**siunnersuutip aappassaaneerneqarneranut**

**ISUMALIUTISSIISUTAA**

Ataatsimiititaliap suliarinninnermini ilaasortarai:

Inatsisartunut ilaasortaq Bendt B. Kristiansen, Inuit Ataqtigiit, siulittaasoq

Inatsisartunut ilaasortaq Jens-Erik Kirkegaard, Siumut, siulittaasup tullia

Inatsisartunut ilaasortaq Anders Olsen, Siumut

Inatsisartunut ilaasortaq Jess Svane, Siumut

Inatsisartunut ilaasortaq Villy Olsvig, Inuit Ataqtigiit

UPA 2017-ip nalaani ulloq 3. maj 2017-imi siullermeerinninnerup kingorna ataatsimiititaliap siunnersuut misissorpaa.

**1. Siunnersuutip imarisaa siunertaalu**

Taarsigassarsitinneqarsinnaanngitsutut niuerfinni nalilerneqartut taarsigassarsinissamut periarfissinneqarnissamik ujartuinerat malinneqarsinnaaqullugu pisortani taarsigassarsisarnernik pilersitsinissamut pilersaarummik suliaqarnissamut Naalakkersuisut peqquneqarnissaat aalajangiiffigisassatut siunnersuuteqarnermi siunertarineqarpoq.

**2. Siunnersuutip Inatsisartunit siullermeerneqarnera**

Siunnersuuteqartup siunnersuuteqarnermini anguniagaa partiinit tamanit taparserneqarpoq.

Naalakkersuisut pilersaarusiornissaat ukiumik ataatsimik sivitsorneqassasoq Demokraatit inassutigaat.

Inuiaqatigiinni taarsigassarsisitsisarneq inuit ataasiakkaat taarsigassarsiaminnik utertitsisinnaassuseqarnerannik tunngaveqartinneqassasoq Partii Naleqqap erseqqissarpaa.

Naalakkersuisut aalajangiiffigisassatut siunnersuut taperserpaat aammalu inissiamik aningaasalersuisarnerup iluani iluarsaaqqinneq aallartinneqareersoq aammalu innuttaasunut appassisumik akunnattumilluunniit isertitalinnut annertunerusumik iluaqutissiisoq innersuussutigalugu.

### **3. Ataatsimiititaliap siunnersuummik suliarinninnera**

Nunatsinni inissianik pilersuineranut tunngatillugu inatsisissatut siunnersuutit piareersarnerat Naalakkersuisunit aallartinneqareersoq Sanaartornermut Ataatsimiititaliamit maluginiarneqarpoq, taakkununga ilaapput inissianik aningaasalersuisarneq, piginneqatigiilluni inissiat, akileraartarnikkut allannngortitsinerit ernianut tunngasut kiisalu taarsigassarsineranut killigititanik naleqqussaaneq.

Inissiamik pisinissamut aammalu inissiamik sananissamut sipaagaqarusussutsimik takutitsilluni aalajangersimasumik amerlassusilinnik aningaasanik sipaagaqarsinnaagaanni pisortani taarsigassarsinissamut ullumikkut periarfissat nunatsinni inissianik imminut pilersornissamut periarfisseereersut Sanaartornermut Ataatsimiititaliamit maluginiarneqarpoq.

Ineqarnermik iluarsaaqqinneq qanoq ilusilersorneqarsinnaanersoq pillugu Naalakkersuisut isummernissamut tunngavissiassaata Sanaartornermut Ataatsimiititaliamit qilanaarineqarpoq.

Pisortat annaasaqaratarsinnaanerannik minnerunngitsumillu pisortat allaffissornerannik annikillisisumik pisortat qularnaveeqqusiisarnerannik, qularnaveeqqusiussisarnerannik imaluunniit toqqaannartumik piginneqataasarnerannik Tului Nunaanni misilittakkat Sanaartornermut Ataatsimiititaliamit Naalakkersuisunut eqqumaffigeqquneqassapput. Tamatuma peqatigisaanik pisortat salliullutik qularnaveeqqummik tigungminnikkunnaassapput, taamaalillunilu taarsigassarsianik akiliinngitsoornermi naalakkersuinikkut isiginiagassat salliutinngit aningaasaqarnikkut isiginiagassat salliutinneqalissapput. Tamanna tunngavigalugu ilisimaneqarluartut kisiisa pinnagit aaqqiissutissat allat misissorneqarlutillu isumaliutigineqarnissaat ataatsimiititaliamit kaammattuutigiumaneqarpoq.

### **4. Siunnersuutip aningaasaqarnikkut kingunerisassai**

Aalajangiiffigisassatut siunnersuutip piviusunngortinneqarnerani aningaasatigut allaffissorinnikkullu kingunerisassat siunnersuummut tunngavilersuummi allaaserineqassasut Inatsisartut Suleriaasianni § 33, imm. 1-imi allassimavoq.

Siunnersuutip piviusunngortinneqarnerani aningaasatigut kingunerisassat tamanna naapertorlugu siunnersuummi nalunaarneqartut ataatsimiititaliamit maluginiarneqarpoq,

naallu nalunaarutip inaarutaasup nutserneqarnera siammarterneqarneralu aningaasartuuteqarfiusussaagaluartoq ataatsimiititaliamit tutsuigineqarpoq taakku suliaasaqarfimmut aningasaliissutinut ilanngunneqarsinnaasut.

Pilersaarummik suliaqarnissaq aalajangiiffigisassatut siunnersuummi taamaallaat anguniarneqarmat pilersaarutip piviusunngortinneqarnissaanik aalajangiisoqarsinnaaneranut atatillugu aningaasartuutaajunnartut matumani taasissutissap avataaniittutut ataatsimiititaliamit nalilerneqarput.

#### **5. Ataatsimiititaliap inassuteqaataa**

Siunnersuutip taama iluseqarluni Inatsisartunit akuerineqarnissaa ataatsimiititaliap **isumaqatigiittup** inassutigaa.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.




---

Bendt B. Kristiansen,  
Siulittaasoq




---

Jens-Erik Kirkegaard,  
Siulittaasup tullia




---

Jess Svane



---

Anders Olsen



---

Villy Olsvig